

MISSIVA

**davart il proget da fusiun dals cumüns
Ardez, Ftan, Guarda, Scuol, Sent, Tarasp**

FÜR DEN DEUTSCHEN TEXT: BÜCHLEIN BITTE UMDREHEN

Dumonda da votaziun

Vöglian Ellas/Els, stimadas votantas/stimats votants, acceptar il contrat da fusiun e quattras approvar la fusiun da cumüns?

Arcumandaziun

Las suprastanzas cumünalas respectivamaing ils cussagls cumünals dals 6 cumüns sun persvas da la fusiun: ella es necessaria, ella güda a trar a nüz sinergias, dà novs impuls e pussibiltescha da mantgnair e sviluppar inavant sportas importantas per l'intera regiun. Ellas/els propuonan perquai d'approvar il contrat da fusiun.

Il plü important in fuorma concisa

Perche üna fusiun?

Las pretaisas da la Confederaziun e dal Chantun sco eir da la populaziun invers ils cumüns creschan. I vain eir spettà cha'ls cumüns dvaintan vieplü professiunals ed efficiants. Da tschella vart esa adüna plü difficil da chattar personas qualificadas pels gremis politics. Ün cumün plü grond ha plü bunas premissas per schoglier tuot quists problems.

Svilup dal proget

Daspö duos ons as dedicha üna gruppa da 20 personas al proget da fusiun dals 6 cumüns. La populaziun es gnüda integrada cun sairadas d'infurmaziun, lavuratori e forums da discussiun. Implü han gnü lö eir sezzüdas cun differentas gruppas d'interess. Daspö october 2013 sta a disposiziun il rapport da fusiun actualisà davo man. La populaziun dals ses cumüns e las gruppas d'interess han pudü tour pusiziun, depuoner giavüschs ed exprimer resalvas. Bliers buns impuls han pudü gnir resguardats aint il rapport final.

Svilup dal cumün nouv

Bleras robas nu pon gnir fixadas ouravant, siond chi ston gnir decisas dals respunsabels e da las votantas e votants dal nouv cumün. La discussiun politica cumainza pür davo la votumaziun. Lura vain dumandada la partecipaziun dal suveran per fuormar e decider pass per pass il svilup dal cumün fusiunà.

Quorum

La fusiun aintra in vigur scha'l cumün da Scuol ed almain trais ulteriurs cumüns approveschan il contrat. Natüralmaing fusiuneschan be ils cumüns chi dischan da schi. Quist proceder rispetta la voluntà dal singul cumün.

Ils organs politics dal nouv cumün

Mincha fracziun (Ardez, Ftan, Guarda, Scuol, Sent, Tarasp) dal cumün fusiunà ha ün sez aint illa suprastanza cumünala, il settavel commember es il president cumünal chi vain elet separadamaing. Cun quist sistem han surtuot las fracziuns pitschnas ün grond pled in chapitel. Las singulas fracziuns han eir la pussibilità d'installar rapreschantanzas localas.

Administraziun e gestiuns

L'organisaziun dess esser flincha, efficianta e professiunala. L'administraziun cumünala as rechatta da princip a Scuol. Avant chi vegnan fattas grondas investiziuns in novs objects – esa da pisserar cha'ls stabilimaints cumünals existents in tuot las fracziuns sajan trats a nüz optimalmaing. La retratta da bigliets dal Vereina ed oters servezzans cumünals vegnan sports scha pussibel dals posts d'infurmaziun turistica chi's rechattan in mincha lö. L'administraziun/surveglianza forestala vegnan centralisadas a Sent. Mincha

fracziun dispuona d'ün servezzan tecnic, l'organisaziun capita in ün lö central.

Scoula

Ils lös da scouline (Ardez, Ftan, Scuol e Sent), da la scoula primara (Ardez, Ftan, Scuol, Sent e Tarasp) e dal s-chalin ot (Scuol e Sent) vegnan mantgnüts, fintant cha las cifras da scolars permettian quai. Scha'l cumün vül spordscher üna scoula da di in ün lö pudess quai esser la chasa da scoula dad Ardez.

Vias champestras e chamonnas cumünalas

Il cumün fusiunà prevezza soluziuns simplas e bain pratichablas per l'adöver da las vias champestras. Pellas chamonnas cumünalas surpiglia'l las basas legalas da mincha cumün e tillas applichescha inavant.

Situaziun finanziaria

La situaziun finanziaria dal cumün fusiunà es bainquant plü favuraivla co quella dals 6 cumüns singuls:

- Il cumün fusiunà po far plü bleras investziuns co ils 6 cumüns insembel schi restan separats e promover uschè l'economia chi sta davant ün avegnir difficil.
- El po redüer seis debits fin dal 2017 per passa 12'000'000 francs.
- Cun l'egualisaziun da finanzas actuala dispuona'l da passa 850'000 francs l'on implü (el füss aint illa classa da finanzas 4, quai porta gronds avantags finanziaus)
- Cun l'egualisaziun da finanzas nouva dispuona il cumün fusiunà da 1'300'000 francs l'on implü (ella favorisescha cumüns mezdans e gronds cun bleras fracziuns, bleras vias e gronds territoris in relaziun culs abitants).
- Il pè d'impostas da 100% es radschunaivel, supportabel ed attractiv. Il pè da l'imposta fundiaria vain fixà sün 1.5 ‰, per Sent vül quai dir üna reducziun per 0.2 ‰, pro'ls oters cumüns resta'l sco fin qua.
- Las taxas per dons elementars chi vegnan inchaschadas hoz ad Ardez, Ftan e Scuol vegnan s-chassadas. Da quista masüra profitan possessuors da chasas in quels trais cumüns.
- La contribuziun chantunala per la fusiun importa 10'000'000 francs. Implü paja il Chantun 750'000 francs vi dals cuosts dal cumün da Sent per la meglioraziun.

Nom e vopna, lingua e cultura

Il nom dal cumün fusiunà (sco unità administrativa) es Scuol. Ils noms dals ulteriurs cumüns restan inavant pella tabla dal cumün, pellas adressas postalas etc. I vain s-chaffida üna nouva vopna. Unicamaing in ün prüm pass vain surtutta la vopna dal cumün da Scuol. La cultura, la lingua, las üsansas e las societats in mincha fracziun vegnan promovüdas eir dal cumün fusiunà, quai per rinforzar l'identità da mincha lö.

Perche decider uossa?

1. Be cun üna decisiun la fin da marz 2014 resta temp avuonda per realisar la fusiun chi dess entrar in vigur ils 1. schner 2015.
2. Differents impiegats vegnan pensiunats o bandunan lur piazza d'ürant il 2014. Quai es il dret mumaint per metter insembel las gestiuns dals differents cumüns. Uschigliö ston ils cumüns pertocs darcheu occupar quellas plazzas.
3. La decisiun da la regenza grischuna vala be scha la votaziun davart quist proget sco eir la decisiun dal Grond cussagl succedan d'ürant il 2014.

Remarcha preliminar: In quista missiva vain dovrada minchatant l'expressiun „fracziun“ per discuorrer dals “cumüns actuals” (Ardez, Ftan, Guarda, Scuol, Sent e Tarasp) chi dessan far part dal nouv cumün fusiunà. Per part vain discurrei eir dals “cumüns da fin qua” o “anteriurs cumüns”. Eir scha “fracziun” significha tenor dret chantunal alch oter, dovraina quista expressiun per nos proget cun quai ch'ella es bain inclegiaintaivla.

Quista missiva es ün riassunt dal rapport da fusiun. Chi chi vuol savair ils detagls dal proget po retrar quist rapport pro las chanzlias cumünalas o til s-chargiar da las paginas d'internet dals 6 cumüns.

Introducziun

Tour per mans ün proget da fusiun es üna gronda sfida. Ün o tschel as dumandarà perche chi füss da fusiunar cumüns chi'd existan daspö var 150 ons.

Fin dal 1851 haja dat 48 cumüns aint il chantun Grischun. Perquai chi nun es reuschi da reglar dumondas fundamentalas davart las organisaziuns dals cumüns, s'ha fuormà infra cuort temp ün grond nomer da cumüns – minchün cun üna grond'autonomia.

Las novas egualisaziuns da finanzas tanter Confederaziun, Chantun e cumüns ans metta davant novas sfidas, ed als cumüns vegnan adössadas adüna daplüssas incumbenzas. Plünavant creschan las pretaisas da la Confederaziun e dal Chantun sco eir da las convaschinas e dals convaschins. Da tschella vart esa adüna plü difficil da chattar personas chi's mettan a disposiziun pels gremis politics. Blers cumüns han cumanzà perquai da reponderar lur structuradas e da's far impissamaints davart üna fusiun.

Eir las suprastanzas cumünalas dad Ardez, Ftan, Guarda, Scuol, Sent e Tarasp han decis d'iniziar ün proget. Ils 6 cumüns dessan fuormar ün cumün nouv cun raduond 4'700 abitants. La proposta da fusiun correspuonda a las ideas da la regenza e dal Grond cussagl dal chantun Grischun a regard la refuorma da las structuradas territorialas.

Ils 6 cumüns han inoltrà al Chantun in october 2013 la dumonda per üna contribuziun da fusiun. La resposta da la regenza es statta ourdvard positiva. Cun decisiun dals 10 december 2013 ha'la garanti üna contribuziun da 10 milliuns francs, implü amo ulteriuras contribuziuns e sustegns.

Üna fusiun porta avantags e dischavantags. Nus eschan però persvas cha'ls avantags sun bainquant plü gronds. Cun s-chaffir ün cumün plü grond eschna plü ferm, eir finanzialmaing, e pronts pellas sfidas da l'avegnir.

1. SITUAZIUN DA PARTENZA

1.1. Cundiziuns politics generalas

La tematica da las refuormas dals cumüns ha surgni üna gronda dinamica. In basa a las cundiziuns generalas esa da far quint cha la collavuraziun dvainta in avegnir amo plü importanta. I's muossa adüna plü ferm ch'amegldramaints considerabels pon gnir raggiunts be cun refuormas fundamentalas da la structura (fusiuns). Il nomer dals cumüns svizzers s'ha diminui cuntinuadamaing d'ürant ils ultims ons. Impustüt la diminuziun daspö l'on 2000 dà ferm in ögl.

1.2. Situaziun da partenza aint il Chantun Grischun

Da grond'importanza in Grischun es la collavuraziun intercumünala. Pel mumaint saja bler dapli cooperaziuns intercumünalas co cumüns. Quellas accomplischan insembel diversas incumbenzas chi füssan massa grondas pels singuls cumüns. Las collavuraziuns intercumünalas han blers aspets negativs: Ils consorzis intercumünals han suvent dapli cumpetenzas co ils cussagls cumünals e valan perquai sco pac democratics, i tils manca la flexibilità, id es difficil da tscherner delegats adattats.

Pervi da quistas structures "exista hoz tanter Chantun e cumüns ün intretschamaint pac cler da lezchas e finanziaziuns cun grondas dependenzas vicendaivlas, dublicitats administrativas e respunsabilitats masdadas." Quai scriva la regenza in sia missiva a man dal Grond cussagl (quadern nr. 20/2008–2009) in regard a la reorganisaziun da l'egualisaziun da finanzas e da la repartiziun da las incumbenzas tanter il chantun ed ils cumüns. Plünavant: „L'egualisaziun da finanzas dadaint il Chantun – chi's cumpuona d'üna egualisaziun da finanzas directa ed indirecta – ha manguels considerabels. Ella cuntegna diversas contribuziuns unicas chi sun tanter oter dependentas dal cumportamaint in regard a las sortidas ed al pè d'impostas. L'egualisaziun da finanzas nun es transparenta, greiva da manar e dà fos stimul.“

Il Grond cussagl ha approvà illa sessiun da december 2013 la nouva egualisaziun da finanzas. Quista egualisaziun favurisescha cleramaing cumüns plü gronds cun bleras fracziuns, blers kilometers vias cumünalas e gronds territoris in relaziun cul numer d'abitants. Il böt da quista refuorma d'eira ch'ella aintra in vigur süls 1. da schner 2015. Quel termin nu po eventualmaing plü gnir tgnü aint cun quai chi'd es gnü lantschà il referendum da singuls circuls in Engiadin'Ota. Schi vessan dad avair success cun ramassar las suottascripziuns necessarias vegna a la votumaziun dal pövel. Schi va però tenor la voluntà d'üna fich gronda majorità dal Grond cussagl e da fich blers exponents da cumüns da center, da cumüns turistics e da cumüns perifers, stuves quist proget gnir acceptà a l'urna. Quai less però dir cha l'egualisaziun pudess in quel cas entrar in vigur pür ils prüms schner dal 2016.

L'egualisaziun da finanzas vain in mincha cas, o bod o tard, e perquai esa important cha las structures dals cumüns sun fingià preparadas a temp per l'avegnir.

1.3. Refuorma territoriala e cumünala in Grischun

La regenza ha preschantà al Grond cussagl illa sessiun dal favrer 2011 ün rapport davart la refuorma territoriala e cumünala e formulà in quel ils seguaints böts:


- Las structures statalas dessan as drizzar consequentamaing davu las pretaisas actualas e futuras dals dovairs.
- L'abilità da prestaziun, la forza d'aigna finanziaziun e l'aigna respunsabilità dals cumüns politics dessan gnir rinforzadas.
- Ils cumüns dessan schoglier autonomamaing lur lezchas uschè bain sco pussibel, i'l sen da l'abitant, in möd efficaci e favuraivel.
- Las premissas per la structuraziun nouva da l'egualisaziun da finanzas dessan gnir amegldradas.
- Las structures plü simplas sül s-chalin regiunal dessan amegldrar la trasparenza e la sgürezza legala sco eir amegldrar las premissas per realisar ils dovairs regionalis.

La strategia per ragiundscher quists böts es üna diminuziun dal nomer dals cumüns: fin dal 2020 sün 50 fin 100, a lunga vista dafatta suot 50 cumüns. Il Chantun dess gnir structurà in trais s-chalins: dasper il

Chantun dessa dar in prüma lingia cumüns fermes e tanter Chantun e cumüns, per quellas incumbenzas cha'l Chantun respectivamaing ils cumüns vöglian surdar ad ün'otra unità, dessa dar las regions.

2. Organisaziun ed andamaint dal proget

2.1. Organisaziun dal proget




Il proget da fusiun es gnü elavurà sün trais s-chalins. La gruppa da proget ha fat la lavur da detagl. Quai vuol dir: las 5 gruppas da lavur han preschantà lur lavuors a tuot la gruppa da proget, quella ha discus ils differents affars ed elavurà propostas correspudentas. Ils cussagls cumünals han discus quistas propostas avant co tillas preschantar a las radunanzas cumünalas.

Ils cussagls cumünals han eir tut incunter intimaziun e giavüschs da la populaziun e dat inavant quels a la gruppa da proget per l'elavuraziun. Dürant ils lavuratori ha tut incunter la gruppa da proget directamaing ils giavüschs dals participants.

Ils accumpognaders dal proget e'l secretariat han pisserà pella coordinaziun.

2.2. Andamaint dal proget



Fingia d'utuon 2011 vaivan decis las suprastanzas cumünalas da Ftan, Scuol, Sent e Tarasp da vulair inziar ed elavurar ün proget da fusiun. Pac plü tard es segui eir il cumün d'Ardez, e quai cun üna decisiun clera da la radunanza cumünala. Dürant las lavuors da proget ha inoltrà eir il cumün da Guarda la dumonda da pudair far part. Davo üna discussiun tanter ils cumüns e'ls grond cusgliers ed ils respunsabels dal Chantun es gnü fixà definitivamaing il perimeter da la fusiun. La radunanza cumünala da Guarda ha lura confermà siaintenziun in üna votumaziun consultativa.

Duos firmas externas sun gnüdas incumbenzadas cul accumpognamaint dal proget, quai in collavuraziun cul uffizi chantunal da cumüns. In favrer 2012 es gnü lantschà il proget da fusiun.

La grappa da proget ha gnü bundant 30 sezzüdas ed elavurà la basa dal proget: il rapport, la missiva ed il contrat da fusiun. 5 jadas ha'la invidà a la populaziun a sairadas d'infuormaziun, lavuratoris e forums da discussiun. Plünavant han gnü lö sezzüdas cun ed infuormaziuns per gruppas pertoccas specialmaing, p.ex. ils impiegats cumünals, la magistraglia, ils paurs, ils rapreschantants dals cumüns da vaschins etc. La grappa da proget ha eir invidà a la "gruppa d'independents per ün bun proget da fusiun" a duos inscuters per discuter lur propostas e dumondas. Ils partits politics, otras organisaziuns e societats han organisà inscuters d'infuormaziun e da discussiun per cha las personas interessadas as possan far ün purtret dal proget.

Thomas Kollegger, il schef da l'uffizi chantunal da cumüns, ha intunà d'incuort cha'l proget da fusiun dals 6 cumüns in Engiadina Bassa saja ün fich bun proget elavurà da maniera fich detagliada. Normalmaing nu sajan ils progets da fusiun elavurats fingià uschè in detagl avant il termin da la votumaziun. I nu saja ne pussibel ne radschunaivel da vulair avair fixà tuot avant chi vain decis da fusiunar. Il process da la fusiun cumainza pür inandret davo la votumaziun. Tuot las votantas e tuot ils votants dal cumün fusiunà ed eir las instanzas dal cumün nouv pon lura avair pled in chapitel ed eir la libertà da sviluppar inavant lur cumün tenor ils bsögnns futurs.

Fasa da transfuormaziun: Il cumün fusiunà unifichescha tuot las ledschas e tuot ils reglamaints il plü svelto pussibel, il plü tard però infra 5 ons. Fin pro l'entrada in vigur correspudenta applichescha la suprastanza cumünala – in basa al dret transitori – las ledschas valablas pel territori dals anteriurs cumüns.

3. Il cumün nouv

3.1. Viver, abitar e lavurar

Mincha lö ha üna taimpra tuottafat speciala, quai in regard a la cuntrada, las qualitats turisticas, economicas e culturalas. Quistas particularitats localas dëssan gnir mantgnüdas e chüradas eir in avegnir. Cun metter insembel organisatoricamaing quists lös vain s-chaffida ün'unità cun bliers lös attractivs per viver, abitar e lavurar cun ün grond potenzial turistic.



3.2. Ün cumün cun forza

cumün	abitants stadi dec. 2011	surfatscha ha
Ardez	428	6'144
Ftan	526	4'312
Guarda	164	3'145
Scuol	2'353	14'414
Sent	896	11'172
Tarasp	348	4'690
Total cumün nouv	4'715	43'877

Il cumün nouv cun passa 4'700 abitants ed üna surfatscha respettabla da bod 44'000 ha üna gronda forza in Engiadina, in Grischun ed in regard tscherts temas dafatta sün s-chalin naziunal.

3.3. Nom e vopna

Il cumün nouv dess avair nom Scuol. Ils ulteriurs noms dals cumüns vegnan mantgnüts ed eir dovrats per l'adressa postala. Las tablas da cumün restan sco fin qua cun sü il nom dal singul lö e na dal cumün fusiunà. Il nom dal cumün nouv es unicamaing il nom da l'organisaziun politica / administrativa e da la marca chi's preschainta vers inoura. Perquai nun es adattà ün nom da fantasia o ün nom rural. Id es plü radschunaivel da tscherner ün nom chi'd es cuntshaint pro indigens, giasts, instituziuns ed uffizis chantunals e federalis. Il nom da Scuol es il plü cuntshaint in quist perimeter da fusiun. Da quai profita eir il cumün nouv.

Pel temp transitori vain surtutta la vopna da Scuol, cun quai cha Scuol es l'unic cumün chi sto approvar il contrat da fusiun in mincha cas per cha la fusiun vegna insomma realisada. In ün seguond pass vain s-chaffida üna vopna nouva.

3.4. Cultura e lingua

Las societats vegnan sustgnüdas i'l listess rom sco fin uossa. Perquai esa da mantgnair eir ils locals d'inscunter aint ils singuls cumüns. Eir las üsanzas vegnan mantgnüdas independentamaing da la fusiun.

La varietà culturala chi fa oura il particular da mincha lö, dess restar eir in avegnir ed eir gnir promovüda. Il rumantsch vallader es la lingua officiala eir dal cumün nouv.

4. ORGANISAZIUN STRATEGICA

4.1. Cumünanza d'urna

La cumünanza d'urna es previsa sco l'organ il plü ot dal cumün nouv. Ella decida davart decrets e müdamaints da la constituziun cumünala e da las ledschas cumünalas. L'urna es eir l'istanza chi tscherna ils commembers da la suprastanza cumünala, il president cumünal, la cumischiun sindicatoria ed il cussagl da scoula.

4.2. Radunanza cumünala

La radunanza cumünala ha vastas competenzas. Ella decida davart dumondas finanzialas e'l preventiv, ella fixa il pè d'impostas ed approvescha il quint cumünal. In radunanza cumünala vain eir orientà e discus davart tuot ils affars chi vegnan suottamiss plü tard a la votumaziun a l'urna. Las radunanzas cumünalas dessan pudair avoir lö in minchüna da las 6 fracziuns.

4.3. Suprastanza cumünala

La nouva suprastanza cumünala as cumpuona d'ün president / d'üna presidenta e da 6 commembers. Ella vain eletta a l'urna. Mincha fracziun ha il dret d'avair ün sez illa suprastanza cumünala, l'ulterier sez vegn occupà dal president cumünal. Sch'ün obain duos dals cumüns aint il perimeter da fusiun decidan da nu vulair fusiunar, schi's redüa la suprastanza cumünala correspudentamaing.

La suprastanza cumünala decida davart l'ordinaziun e müdamaints dad uordens impegnativs in general, da l'uorden da personal e dal reglamaint da servezzan.

4.4. Cussagl da scoula

Eir il cussagl da scoula vain elet a l'urna, eir el as cumpuona da set commembers. Mincha fracziun ha il dret d'avair ün sez. Quai eir per garantir l'acceptanza, ils contacts e las cugnuschentschas localas (üsanzas e.u.i.). L'ulterier sez vain occupà dal schef dal dicasteri correspudent in suprastanza cumünala.

4.5. Cumischiun sindicatoria

A la cumischiun sindicatoria fan part tschinch commembers, eir els vegnan elets a l'urna. In quista cumischiun vegnan tschernüts ils candidats cullas plü bleras vuschs, i nu dependa da che fracziun ch'els vegnan. L'incumbenza da reveder la contabilità cumünala dess gnir surdatta ad ün büro fiduziari.

4.6. Iniziativa e referendum

Ultra dal dret da vuschar / eleger a l'urna esa eir pussibel da far ün referendum e da lantschar ün'iniziativa. Cul referendum vain pretais ch'ün affar decis da la radunanza obain la suprastanza cumünala vegna suottamiss ad üna votumaziun a l'urna. Cun ün'iniziativa as poja pretender chi vegna vuschà publicamaing davart üna proposta dals iniziants. Previsas sun 150 suottascripziuns per lantschar ün referendum o ün'iniziativa. La radunanza ha eir il dret da decider davart moziuns e postulats.

4.7. Direcziun operativa

La direcziun operativa garantischa la colliaziun tanter il s-chalin operativ e'l s-chalin strategic. Ella as cumpuona dal president cumünal, dal manader da l'administraziun (chanzlist), dal manader da las gestiuns tecnicas e dal manader da finanzas. Il president cumünal es delegà da la suprastanza cumünala illa direcziun. La partiziun da lavur in detagl tanter il president cumünal ed ils trais oters commembers da la direcziun vain stipulada in ün reglamaint.


4.8. Parlamaint

La gruppa da proget ha discus eir il tema dal «parlamaint» e fat ponderaziuns in considerond cha'l parlamaint vess almain 17 commembers. Ella propuona da desister d'ün parlamaint, cun quai cha'ls votants han daplü influenza politica cun üna structura sainza parlamaint (democrazia directa). Scha la pratcha demuossa però chi füss meglder dad avair ün parlamaint per ün cumün da quista grondezza as poja müdar quai cun üna revisiun da la constituziun cumünala.

4.9. Rapreschantaziuns localas

Sch'üna fracziun giavüscha quai, schi po ella installar üna rapreschantaziun locala chi'd ha, sco mincha persuna singula eir, ün dret da proposta. L'organisaziun da quist gremi surpiglia il suprastant cumünal da la fracziun respectiva.

4.10. Organigram politic/strategic



5. L'organisaziun operativa

5.1. Administraziun cumünala

L'administraziun cumünala (administraziun, finanzas, gestiuns tecnicas) vain da princip centralisada a Scuol. L'access per la populaziun dvainta plü simpel cun masüras modernas („fanestrigl virtual“ ingio chi's po retrar infuormaziuns, postar formulars ed inoltrar dumondas). Manader da l'administraziun es il chanzlist. Avant chi vegnan fattas grondas investiziuns in novs objects esa da pisserar cha'ls stabilimaints cumünals existents in tuot las fracziuns sajan trats a nüz optimalmaing. Eventualas gestiuns cumünalas – chi's pudess mantgnair da maniera decentrala – ston però pudair lavurar da maniera efficianta ed economicamaing favuraivel.

Tscherts servezzans pellas abitantas / pels abitants dessan gnir sportas inavant da maniera decentrala, per exaimpel sur ils büros d'infuormaziun turistica locala. Quels pudessan surtour per exaimpel la funcziun da vender ils bigliets dal Vereina, dar oura formulars per lavuraints esters ed eir spordscher servezzans da postin tanter la centrala ed ils singuls lös decentrali.

5.2. Gestiuns tecnicas e forestalas

Las gestiuns tecnicas cumpiglian: l'uffizi da fabrica, ils servezzans tecnicos, las sarineras e las canali-saziuns, ils provedimaints d'aua e'ls uffizis forestals.

Il servezzan tecnic dal cumün nouv vain manà e surveglià da maniera centrala, però cun üna structura decentrala pervi da la grondezza e la topografia dal territori. Quai vuol dir chi vain staziunà ün servezzan tecnic in mincha cumün.

L'administraziun (cun secretariat) e la sorveglianza forestala vegnan centralisadas a Sent, là as rechatta eir il lavuratori forestal. Ad Ardez vain deposità il material da mantegnimaint pels repars da lavinas. Il center per laina d'arder as rechatta a Scuol.

5.3. Scuola

Üna sporta da scuola plü decentrala pussibla ha gronds avantags per l'attrattività da la singula fracziun. Ils lös da las scoulinas (Ardez, Ftan, Scuol e Sent), da las scoulas primaras (Ardez, Ftan, Scuol, Sent e Tarasp) e dals s-chalins ots (Scuol e Sent) vegnan perquai mantgnüts, fintant cha las cifras da scolars permettian quai.

Il cumün nouv po spordscher p.ex. differents tips da s-chalin ot e s-chaffir novas sportas sco maisas da mezdi, scoulas da di e.o.p. Per talas sportas as poja far döver eir da las infrastrukturas decentralas. Scha'l cumün fusiunà vuol spordscher üna scuola da di in ün lö pudess quai esser la chasa da scuola dad Ardez. I nu sarà percunter pussibel e surtuot na finanziabel da vulair introdüer quella sporta in mincha lö da scuola. Da princip frequentan ils uffants però la scuola illa fracziun da lur domicil.

L'IOF vain integrà aint il proget da fusiun sco scuola media e scuola chi spordscha la classa da talents. Il cumün fusiunà til sustegna eir in avegnir.

5.4. Agricoltura, alps e pas-chs

Il servezzan d'agricoltura suottasta a l'uffizi da fabrica. Ils pauri da mincha cumün elegian ün rapreschantant da l'agricoltura. Ün da quists rapreschantants ha la funcziun d'intermediatur agricoltura, alps e pas-ch. El es la persona da contact tanter ils rapreschantants e'l schef da l'uffizi da fabrica.

Las corporaziuns existentas sun organisaziuns independentas. Ellas mantegnan lur drets e lur gestiuns inavant sco fin qua.

Quai chi concerna l'adöver da las alps e dals pas-chs in tuot quels lös ingio chi nu dà las corporaziuns d'alp dess gnir pratichà sco fin qua. Quai voul dir cha mincha fracziun mantegna sias gestiuns. Las ledschas e las taxas vegnan però unificadas per tuot las alps dal territori dal cumün nouv.

Ils paurs da la fracziun han il prüm dret per chargiar l'alp in lur fracziun, sco seguond ils paurs dal cumün grond e sco ultim ils paurs d'utrò. Sur dad eventuels müdamaints dessan decider surtuot ils paurs svesa.

5.5. Pumpiers

Ils 6 cumüns collavuran fingià hoz sül sector da pumpiers. Ils cumüns da Ftan, Scuol, Sent e Tarasp fuorman il consorzi da pumpiers Pisoc, ils cumün da Guarda ed Ardez ün ulteriur consorzi. Il cumün nouv maina ün unic corp da pumpiers, ils consorzis existents vegnan scholts. La prontezza d'agir locala vain mantegnüda.

5.6. Chamonnas cumünalas ed alps per l'adöver na agricul

Il cumün nouv surpiglia da mincha cumün ils reglamaints valabels actualmaing e tils applichescha inavant pel territori correspondent. L'abitant da la fracziun dess avoir da princip sco prüm il dret correspondent avant ils abitants chi'd abitan in otras fracziuns.

5.7. Vias da god e vias champestras

Tuot ils 6 cumüns han aignas ledschas per las vias da god / las vias champestras e tillas applicheschan differentamaing. Il cumün nouv tschercha üna soluziun simpla, unificada ed inclegiantaivla chi vain elavurada in collavuraziun cullas differentas gruppas d'interess. Previs esa da s-chaffir differentas categorias d'adöver, sco vias libras cun e sainza permiss, vias cun permiss limitats, vias cun permiss pel access a stabels ed a fuond chi vain cultivà e vias cun scumond.

5.8. Relaziuns da lavur existentas

Il cumün nouv surpiglia tuot ils contrats da lavur existents. El po decider davart adattamaints organisatorics (p.ex. il lö da lavur) scha quai fa dabsögn per pudair raziunalisar la lavur.

In üna prüma fasa, q.v.d. cun realisar la fusiun, crescha la lavur. Plü tard as corregia quista situaziun, ed i sarà pussibel da redüer plazzas da lavur. Quai capita però unicamaing cun sortidas natüralas (desdittas da l'impiegà, pensiuns etc.).

Cun quai ch'alchünas personas van in pensiun d'ürant il 2014 o s'orienteschan otramaing, as tratta da reagir in quist mumaint e da metter insembel las gestiuns. Schi's manchainta quist mumaint es sforzà mincha cumün dad occupar darcheu quels posts il plü svelts pussibel.

6. Finanzas

6.1. Situaziun da partenza

	Ardez	Ftan	Guarda	Scuol	Sent	Tarasp
pè d'impostas 2012	88	110	100	105	105	90
classa da finanzas (nouv 2014-2015)	2 (2)	3 (3)	3 (4)	3 (3)	4 (3)	2 (3)
impostas 2011	1'352'948	1'698'190	446'996	9'903'168	2'867'506	1'379'973
facultà/debit per abitant 2011	4'883	-2'082	9'853	-3'032	-2'378	-2'426
investiziuns brutto (media ultims 5 ons)	1'371'220	908'386	362'145	5'143'876	2'078'342	1'742'537
investiziuns netto (media ultims 5 ons)	779'119	359'347	235'960	3'063'434	1'032'424	1'632'938
cash-flow (media dals ultims 5 ons)	743'664	776'837	532'316	5'324'866	1'470'187	995'416
cash-flow 2011	1'017'321	422'224	557'927	4'950'829	1'253'282	1'042'942

6.2. Svilup da la situaziun finanziaria cun o sainza la nouva egualisaziun da finanzas

Il Grond cussagl ha decis cuntshaintamaing illa sessiun dal december 2013 da realisar üna nouva egualisaziun da finanzas chantunala. Quella es plü güsta co l'egualisaziun da finanzas actuala. Ella favurisescha per exaimpel cumüns mezdans e plü gronds chi'd han bleras fracziuns, bliers kilometers vias cumünalas e gronds territoris in relaziun cul numer d'abitants. Il cumün fusiunà da Guarda fin a Sent profita fich ferm da l'egualisaziun da finanzas. Scha quists 6 cumüns sun fusiunats es il bilantsch global per 1.3 milliuns l'on meglder co scha'ls 6 cumüns restan minchün dapersai. Quai vuol dir cha'l cumün fusiunà ha minch'on ün cash flow chi'd es per 1.3 milliuns meglder co scha'ls cumüns restan sulets.

Scha l'egualisaziun da finanzas vain introdütta pudess as prestar il cumün ün pè d'impostas da 95%. Intant han però comunicà differents exponents da l'Engiadin'Ota da vulair lantschar il referendum cunter l'egualisaziun da finanzas. Sch'els rablan insembel las suottascripziuns necessarias vegna ad üna votumaziun dal pövel. In vista a tuot quels chi profitan da quista nouva egualisaziun da finanzas es la probabilità pitschna cha'l suveran grischun tilla refüsa. Il referendum ha però per consequenza cha l'egualisaziun nu po gnir introdütta pels prüms schner 2015, dimpersè pür ün on plü tard.

Pel cumanzamaint dal proget esa da far quint perquai cun l'egualisaziun da finanzas actuala. Quella maina però eir fingià gronds avantags finanziaals al cumün fusiunà. La regenza grischuna ha nempe decis cha'l cumün fusiunà possa gnir miss pels prossems ons aint illa classa da finanzas 4. Il grond avantag da quista classificaziun es quel cha'l cumün profita da contribuziuns annualas da bundant 500'000 francs pels cuosts da scoula. Scha'l cumün fa investiziuns d'ürant quels ons chi permettann da dumandar subsidis dal chantun

schi profita'l eir in quel sector (provedimaint d'aua etc.). Al mumaint cha la nouva egualisaziun da finanzas aintra in vigur nu daja plü ingüinas classas da finanzas e l'egualisaziun fluischa lura sur ils novs instrumaints d'egualisaziun. In quel mumaint vain il cumün lura illa giodia dals 1.3 milliuns daplü mezs finanziaals sch'el es fusiunà in congual culs 6 cumüns chi restan sulets.

Il nouv cumün as pudess prestar investiziuns annualas da ca. 5 milliuns francs sainza stuvair finanziaar quellas cun chapital ester. Quai adonta dals cuosts implü chi sun da spettar in avegnir (Ospidal, ledscha da scoula e.u.i.).

6.3. Pè d'impostas

Las calculaziuns a reg. il svilup finanziel dal cumün nouv han muossà ch'ün pè d'impostas da 95% füss da respunder be scha la nouva egualisaziun da finanzas vain introdüta. Id es da preverer cha la nouva egualisaziun da finanzas va in votumaziun, e perquai stuvaina far quint cun ün pè d'impostas da 100%. Natüralmaing decida il cumün fusiunà minch'on in radunanza cumünala davart il pè d'impostas.

L'imposta fundiaria dal cumün nouv importa 1.5 ‰. Quai vuol dir: pro'l cumün da Sent daja üna reducziun da 1.7 ‰ sün 1.5 ‰. Pro'ls oters cumüns resta l'imposta fundiaria listess sco fin qua.

La taxa per dons elementars vain s-chassada. Da quista masüra profitan surtuot ils possessuors da chasas dals cumüns dad Ardez, Ftan e Scuol. Quista reducziun importa per mincha possessur – tuot tenor las impostas d'entrada e da facultà ch'el paja – plü o main l'augmuint dal pè d'impostas cha'ls abitants d'Ardez ston acceptar.

7. TURISSEM

Tuot ils ses cumüns as partecipeschan a la destinaziun Turissem Engiadina Scuol Samignun Val Müstair SA (sur l'ESTAG). Per tuot il perimeter vala il medem sistem da taxas. Ils detagls da las taxas da cura e da las taxas da promoziun dal turissem vegnan regladas illa ledscha correspondent. L'administraziun cumünala fa l'inchasch. Ella pissera eir pel transfer dals raps a la destinaziun e pel scumpart a las organizaziuns turisticas dals differents lës. Eir in avegnir ha mincha fracziun ün post d'infurmaziun per giasts ed indigens. Quists büros turistics pudessan gnir schlargiats eir cun sportas per indigens, sco per exaimpel culla vendita da bigliets pel Vereina ed oters servezzans cha'ls singuls cumüns vöglian spordscher in mincha lö.

8. CUMÜN DA VASCHINS

Cun metter insembel cumüns politics fusiuneschan per regla eir ils cumüns da vaschins. Ün'alternativa füss da tils schoglier. La grappa da proget ha decis, davo avair discus cun rapreschantants dals cumüns da vaschins, da fuormar ün nouv cumün da vaschins. Decisiuns impegnativas da lunga dürada cha singuls cumüns da vaschins han trat vegnan surtuttas dal cumün da vaschins fusiunà.

9. CORPORAZIUNS DA BASELZIA

Pro las corporaziuns da baselgia nu daja ingüins müdamaints in consequenza da la fusiun dals cumüns politics.

10. CONTRAT DA FUSIUN

Il contrat da fusiun, la basa giuridica da la fusiun, ha üna fich grond'importanza e sto gnir approvà da la regenza. Cun quist contrat vegnan francadas regulaziuns chi sun impegnativas pel cumün fusiunà e chi nu pon sainz'oter gnir abolidas obain müdadas dal cumün nouv. Per consequenza cuntegna'l puncts fundamentals, chi bainschi nun impedischan il svilup dal cumün fusiunà, però listess chi muossan las conturas organisatoricas dal cumün nouv. Implü regla el dumondas dal dret da procedura pel temp fin a l'entrada in vigur da la fusiun.

Ils 6 cumüns d'Ardez, Ftan, Guarda, Scuol, Sent e Tarasp decidan davart il contrat da fusiun als 29 obain als 30 marz 2013 in radunanza cumünala respectivamaing cun üna votaziun a l'urna, tuot tenor che cha lur constituziun cumünala prescriba. Il contrat vala sco acceptà scha'l cumün da Scuol ed amo trais cumüns til approveschan.

Scha las votantas e'ls votants dischan da schi, cumainzan las lavuors da preparaziun per realisar il cumün nouv. Avant cha la fusiun aintra in vigur esa d'approvar la nouva constituziun e la ledscha d'impostas sco eir d'eleger las autoritats cumünalas e l'organisaziun operativa. Fin cha la fusiun aintra in vigur es activa üna suprastanza transitoria chi consista dals 6 capos.

11. DECISIUN DA LA REGENZA DAL CHANTUN GRISCHUN

La regenza dal chantun Grischun ha decis als 10 december 2013 (protocol 1203) da promover la fusiun cun üna pauschala da promoziun da 5'550'000 francs ed üna contribuziun d'egualisaziun da 4'450'000 francs, in tuot dimena cun 10 milliuns francs. Ella ha decis amo ulteriuras masüras a favur dal cumün fusiunà, tanter oter cha'l Chantun surpiglia tsherts cuosts chi stan in connex culla fusiun.

La decisiun da la regenza as poja leger aint il rapport da fusiun chi sta a disposiziun pro las chanzlias cumünalas e süllas paginas d'internet dals 6 cumüns.

12. PROPOSTA DA LA GRUPPA DA PROGET E DA LAS SUPRASTANZAS

La gruppa da proget e las suprastanzas cumünalas s'han occupadas intensivamaing cun tuot ils aspets d'üna fusiun dals 6 cumüns. Els sun da l'avis cha'ls avantags sajan bainquant plü gronds co'ls dischavantags.

La grondezza dal cumün fusiunà vain classificada sco positiva. Eir las perspectivas economicas sun vaira bunas. Il cumün nouv es ün cumün attractiv e survisibel chi'd es abel d'accomplir in buna maniera las lezchas d'hozindi e da l'avegnir, sainza cha l'identità da mincha fracziun giaja a perder. Cha'l pè d'impostas po importar 100% es ün effet positiv important chi nu vain però rajiunt in prüma lingia pervi da la contribuziun chantunala per la fusiun, dimpersè causa las sinergias, ün meglter scumpart dals cuosts ed üna forza finanziaria dal cumün nouv, chi'd es bainquant megltra co la summa dals 6 cumüns singuls. Cur cha la nouva egualisaziun da finanzas aintra in vigur saraja pussibel da redüer amo plüs debits o lura tenor bsögn eir da far daplü investiziuns.

Da grond avantag esa cha la taxa per dons elementars aint ils cumüns d'Ardez, Scuol e Ftan po gnir abolida sainza chi sun d'augmentar las taxas d'aua annualas.

Il cumün nouv po evitar structuradas administrativas parallelas ed impuonder daplü mezs finanzials per mantgnair, sviluppar e promouver sportas per esser attractivs surtuot in quels sectuors economics dals quals üna gronda part da la populaziun indigena viva.

Las suprastanzas cumünalas dad Ardez, Ftan, Guarda, Scuol, Sent e Tarasp sun da l'avis ch'üna fusiun dals ses cumüns chi dà nouvs impuls per planisar il futur, saja il dret pass, eir per rinforzar la regiun. Ellas propouonan perquai unanimamaing d'approvar il contrat da fusiun.

**Contrat da fusiun tanter ils cumüns dad
Ardez, Ftan, Guarda, Scuol, Sent e Tarasp**

I. In general

1. Ils cumüns politics dad Ardez, Ftan, Guarda, Scuol, Sent e Tarasp fusiuneschan i'l sen da l'art. 87 da la ledscha da cumüns dal chantun Grischun.

2. Il cumün nouv as nomna Scuol.

3. Per ün temp transitori vain surtutta la vopna dal cumün da Scuol.

Davo vain s-chaffida üna vopna nouva.

4. Resalv cha'l Grond cussagl approuva la fusiun, succeda quella süls 1. schner 2015.

Il Grond cussagl deciderà probabelmaing illa seguonda mità dal 2014 definitivmaing davart la fusiun.

5. Il rapport da fusiun e la missiva servan sco basa strategica e directiva per la politica cumünala da l'avegnir.

Numerus temas singuls nu vegnan integrats concretamaing in quist contrat da fusiun, perquai ch'els dessan gnir trattats in connex cun la constituziun cumünala o cun la legislaziun dal cumün nouv. Las autoritats futuras sun però obliadas da s'orientar al cuntgnü dal rapport da fusiun final.

II. Effets giuridics da la fusiun

1. Il cumün nouv aintra illas relaziuns giuridicas dals cumüns d'infin uossa.

Quist artichel circumscriba la successiun universal. Tenor quella van tuottas valuors da facultà, activas e passivas, contracts e convegnas via sül cumün nouv.

2. Il cumün nouv surpiglia las facultats e'ls obligs dals cumüns d'infin uossa incl. ils credits concess.

3. Las fuormas da collavurazun intercumünalas a l'intern dal perimenter da fusiun vegnan scholtas pels 31 december 2014.

Quistas fuormas da collavuraziun a l'intern dal perimenter da fusiun dal cumün nouv vegnan scholtas sül termin da la fusiun. Las incumbenzas vegnan surtuttas dal cumün nouv.

Las organisaziuns Gestiu Forestala Macun (GFM), Consorzi da scoulas A-Z, Consorzi da sarinera Z/B-G, Alleanza d'impostas Ftan – Valsot, Cumünanza d'administraziuns S-L-G e Loipa Scuol – Martina dessan gnir organisadas da nov o lura gnir scholtas considerand il termin da desditta. Las organisaziuns TESSVM, Corporaziun dals cumüns concessiunaris/OEE, Pro Engiadina Bassa (PEB), Center da sandà Engiadina Bassa (CSEB), Circul dal register fundiari EB, Uffizi dal stadi civil En, Rait Engiadina sun fingià organisadas regiunalmaing e restan uschè.

4. La suprastanza cumünala as cumpuona dad ün president e da ses commembers. La suprastanza cumünala as cumpuona dad almain ün commember da mincha fracziun Ardez, Ftan, Guarda, Scuol, Sent e Tarasp. Müdamaints da quist punct da partenza sun pussibels cun üna revisiun da la constituziun cumünala.

5. Il cussagl da scoula as cumpuona dal schef dal dicasteri e da 6 commembers. El as constituischa sves ed as cumpuona dad almain ün commember da mincha fracziun Ardez,

Ftan, Guarda, Scuol, Sent e Tarasp e dal schef dal dicasteri. Müdamaints da quist punct da partenza sun pussibels cun üna revisiun da la constituziun cumünala.

6. Il cumün nouv e sias scoulas s'ingaschan per ün concept da lös da scoula radschunaivel e decentral.

Ils lös da scouline (Ardez, Ftan, Scuol, Sent), da las scoulas primaras (Ardez, Ftan, Scuol, Sent e Tarasp) e dals s-chalins ots (Scuol e Sent) vegnan mantgnüts, fintant cha las cifras da scolars permettan quai, tenor ledscha chantunala. Ils lös da scoula ston gnir fixats in resguardond ils aspets pedagogics ed economic.

7. Aint il cumün nouv han ils manaschis agriculs dals anteriurs cumüns il privilegi da dovrar las pas-chüras da chasa, las pas-chüras d'adöver cumünal, las pas-chüras d'alp, la prada sco er ils ers chi appartegnan als cumüns anteriurs.

8. Aint il cumün nouv han las abitantas ed ils abitants dals anteriurs cumüns il privilegi da dovrar las chamonnas cumünalas e las alps chi appartegnan als anteriurs cumüns.

Il cumün nouv surpiglia las ledschas / ils reglamaints / ils uordens da mincha cumün valabels actualmaing e tils applichescha inavant.

9. Il cumün nouv surpiglia tuot ils contrats da lavur. Id es chosa dal cumün nouv da nüzziar eventualas sinergias e da decider davart adattamaints organisatorics.

III. Proceder

1. La votaziun davart il contrat da fusiun preschaint succeda in occasiun da las radunanzas cumünalas dad Ardez, Guarda e Tarasp ed in occasiun da las votaziuns a l'urna da Ftan, Scuol e Sent.

Las radunanzas cumünalas han lö als 29 marz 2014. Las urnas per la votaziun a l'urna sun avertas fin als 30 marz 2014 e quai fin a l'urari indichà dals cumüns da Ftan, Scuol e Sent. Il proceder da votaziun sto gnir tschemü uschè, perquai cha las constituziuns cumünalas dad Ardez, Guarda e Tarasp prevezzan la radunanza cumünala e las constituziuns cumünalas da Ftan, Scuol e Sent la radunanza a l'urna sco organ competent per trar la decisiun.

2. Il contrat da fusiun preschaint aintra in vigor scha'l cumün da Scuol ed almain trais ulteriurs cumüns dal perimeter da fusiun til approuvan. Scha tuots ils cumüns nun acconsentischan vala il contrat confuorm al sen.

Il contrat da fusiun aintra in vigor eir scha'ls cumüns chi'd approuvan il contrat da fusiun nun as cunfinan. Quels cumüns chi nun approuvan il contrat da fusiun, nu fusiuneschan neir brich.

3. Avant cha la fusiun aintra in vigor vuschan las persunas cun dret da vuschar dal cumün nouv davart la nouva constituziun sco eir davart la nouva ledscha d'impostas. Ellas tschernan eir ils organs chi sun previs tenor la constituziun.

Üna nouva constituziun ed üna nouva ledscha d'impostas esa da relaschar explicitamaing avant l'entrada in vigor da la fusiun. L'approvaziun da quellas sco eir las elecziuns pon succeder amo avant l'approvaziun da la fusiun davart dal Grond cussagl. Tuot las ulteriuras ledschas ed ordinaziuns pon gnir adattadas ed introdüttas successivamaing.

La constituziun e la ledscha d'impostas vegnan approvadas d'üna radunanza a l'urna complessiva. A l'urna vegnan eir tschemüts ils organs chi sun previs tenor la constituziun.

IV. Disposiziuns transitorias

1. **Ils presidents cumünals dals cumüns d'infin uossa fuorman üna suprastanza transitoria. Quista prepara las lavuors da fusiun fin al termin da fusiun ed ha eir üna funcziun coordinativa. Ella as constituischa sves.**

Per las lavuors preparatorias, p ex. per la nouva constituziun, esa necessari d'installar üna suprastanza transitoria. Quista nun ha ingünas cumpetenzas extaisas, ma ella surpiglia ün rolla da preparaziun importanta. La suprastanza vain accumpagnada d'üna persuna respunsabla pel proget, üna persuna interna o externa chi'd es incumbenzada da realisar la fusiun.

2. **Il cumün fusiunà unifichescha sia legislaziun uschè svelt sco pussibel. Fin pro l'entrada in vigur relativa applichescha la suprastanza cumünala, in basa al dret transitori, las ledschas vertentas correspondentas dals cumüns d'infin uossa.**

I nun es realistic cha tuot las ledschas e tuot ils reglamaints vegnan adattats sül termin da l'entrada in vigur da la fusiun. Perquai es ün temp transitori da maximalmaing tschinch ons necessari per far las adattaziuns correspondentas. Dürant quist temp transitori vegnan applichadas las legislaziuns dals singuls cumüns dad hoz.

3. **Ils cumüns d'infin uossa nu das-chan, fin pro l'entrada in vigur da la fusiun, surtour novs dovairs respectivmaing admitter expensas chi nu sun cuntschaintas al mumaint da la stipulaziun dal contrat o chi nu füssan pussiblas da financiar sco cumün sulet o chi nu sun stringentas.**

Quista determinaziun dess garantir cha'ls anteriurs cumüns nu s'oblajan in ingünas manieras per fatschendas incuntschaintas ed obligaziuns chi nu sun necessarias. Sco cuntschaintas valan las investiziuns previsas chi sun indichadas i'l plan d'investiziuns. Per talas sco eir per tuot las ulteriuras intenziuns esa d'orientar a la suprastanza transitoria avant cha quellas vegnan tractandadas per üna radunanza cumünala.

V. Disposiziun finala

Quist contrat da fusiun ha da gnir approvà da la regenza dal chantun Grischun.

Approvà da las radunanzas cumünalas dals 29 marz 2014 e da las cumünanzas d'urna dals 30 marz 2014.

Cumün dad Ardez	Jonpeider Strimer, capo cumünal	Gian Marc Dosch, chanzlist cumünal
Cumün da Ftan	Reto Pedotti, capo cumünal	Flurin Lehner, chanzlist cumünal
Cumün da Guarda	Roger Vulpi, capo cumünal	Seraina Fried, chanzlista cumünala
Cumün da Scuol	Jon Domenic Parolini, capo cumünal	Andri Florineth, chanzlist cumünal
Cumün da Sent	Albert Mayer, capo cumünal	Marco Fallet, actuar cumünal
Cumün da Tarasp	Christian Fanzun, capo cumünal	Tamara Zala, chanzlista cumünala